



El gida tut tgi che dumonda

Arthur Jacomet s'engascha per vegls, impedids e malsauns e fiss bunamain vegnì sut las rodas.

2



A la tschertga da radis malsanadaivels

Erwin Tschanner è radiestet ed ha preschentà la radiestesia al Café rumantsch da Masagn.

13

südostschweiz

LA QUOTIDIANA

Redacziun: Via Sommerau 32, 7007 Cuiria, tel. 081 255 57 10, redacziun@laquotidiana.ch

Il Bostg ha envidau a fiasta

■ (anr/ac) Responsabels per la sera da catschadurs tradiziunala dalla Secziun Bostg ein catschaduras e catschadurs d'Andiast stai. Ed els han buca trumpau las visetas neu da Siat, Rueun, Pigniu e Vuorz. Cun in'excelenta puschida culinaria, dabia divertiment cun in toc humoristic ed accumpignament musical. In dils puncts culminonts dalla sera da catschadurs ei secapescha la presentaziun dallas trofeas dalla davosa catscha. Ellas porschan in interessant maletg dalla preda e dalla preschientscha da selvaschina el territori dalla secziun. La scuntrada da catschaduras e catschadurs dalla sonda vargada ha anflau sia fin ella bar dil Capricorn.

> PAGINA 6

Dimensiuns immensas

■ (anr/gns) An Sibiria ò gia li la 29ava ediziun dall'Universiada d'anviern, l'occurrnza noua tgi students e studentas tgi fon activ sport cumbattan per medaglias. La proxima gEDA ò chel event da sport li a Lucerna e chegl igl schanner 2021. Las cursas da biatlon, chellas on alloura li a Lantsch all'Arena da biatlon. Dalla partei-da an Sibiria è er stada ena delegaziun svizra per piglier invista digl antier travagl dall'Universiada d'anviern. Hannes Parpan da Lai dei d'aveir vasia dimensiuns immensas tar chell'occurrnza da sport. Igl Russ vegian investo 700 milliuns dollars per porscher a tots en'Universiada d'anviern scu anc mai vasia anfignen oz.

> PAGINA 8

Lansel as metta fingià a la lavur

Il prossem Festival da la chanzun rumantscha es in Engiadina

DA FLURIN ANDRY / ANR

■ Il prüm Festival da la chanzun rumantscha cha Clau Scherrer e seis agüdents han organisà a Trun ha gnü grond success. Scherrer ha surdat a Curdin Lansel la bachetta per organisar il prossem festival dal 2022 in Engiadina. Dürant ils trais dis da festa a Trun han in tuot var 2000 persunas visità l'ün o l'oter arrandschamaint dal prüm Festival da la chanzun rumantscha. Üna da quellas persunas es stat il dirigent da cor Curdin Lansel. «Quai ch'eu n'ha badà da prüma davent es stat la bun'atmosfera chi regnaiva tanter ils preschaints», disch el ed agiundscha chi's badaiva eir la voluntà da cuntinuar a lavurar in differents möds vi dal tema chanzun rumantscha. Lansel fa part da la scena da chant rumantscha daspö 35 ons. El es stat commember da l'Uniu da chant grischuna, es dirigent districtual d'onur ed ha realisà adüna darcheu eir arrandschamaints locals, regionalis e surregionalis. Ün exaimpel es il proget cumünaivel dal Cor Proget 18 suot la bachetta da Lansel e dal



Festival da la chanzun rumantscha: Curdin Lansel (schn.) ha surtut da Clau Scherrer l'incumbenza d'organisar il Festival da la chanzun rumantscha da l'on 2022 in Engiadina.

FOTO P. DUFF

Chor Surselva diret da Rest Giuseppe Tuor. «Il Festival da la chanzun rumantscha es important perquai chi's po promover uschea dad üna vart ils uffants e giuvenils chi

chantan e da tschella las novas cumposiziuns rumantschas», accentuescha'l. Perquai es Lansel stat perinlet da surtour l'incumbenza da manar l'organisaziun dal se-

guond Festival da la chanzun rumantscha. Quel varà lö da l'on 2022 inclur in Engiadina. «Il prossem pass es uossa da metter insembel üna buna squadra.»

Via da Luven resta anc serrada

■ (rtr) La via da Luven resta serrada damai ch'ins ha tema ch'ina bova pudess vegnir giu e cuvrir la via. Il traffic vegn svià sur ina via da meglieraziun. Mesemna vegn giuditgà da nov la situaziun. Cunquei ch'il terren saja anc adina en moviment e ch'ins stoppia quintar ch'i vegnia giu ina bova en la Val Pilac restia la via da Luven er ils proxims

dis serrada. Quai ha confermà Gian Claudio Legher da l'uffizi da gaud e privels da la natira envers RTR. Sche tut il material da la bova gress en ina giada giu en la val, lura fissi pussaivel che crappa u material vegnissan bittads sin la via. Gia il mardi era vegnì giu ina bova pli pitschna. Quella era dentant betg vegnida fin sin la via.



Entant ch'il terren è anc adina en moviment resta la via da Luven anc serrada.

FOTO RTR, R. PFISTER

Prelecziun teatrala a Sent

■ (anr/bcs) Ils responsabels da la Grotta da cultura a Sent han preschantà d'incuort üna prelecziun teatrala cun Sarah Magdalena Huisman i'l piertan da la Grotta. Ella ha prelet e giovà tenor il cudesch «Das grüne Seidentuch» da Marcella Maier. Ün istorgia commoventa chi quinta da la vita da quatter duonnas chi han passantà temps greivs ed in povertà. D'üna

vita ch'id es gnüda influenzada da guerras, da temps ingio cha blers han stuvü emigrar causa la gronda s-charsdà da lavur illas valladas muntagnardas da la Bergiaglia e da l'Engiadina. Huisman ha chatà üna buna via tanter prelecziun e scenas teatralas per declerar la situaziun difficila da quella jada.

> PAGINA 9

Cunter experiments cun animals e cun umans

■ (rtr) L'iniziativa populara che vul scumandar experiments cun animals ed umans han ils iniziants inoltrà ier a la chanzlia federala. Var 124 000 sutscrizziuns han ils iniziants rimnà, sco els han communitgà. L'iniziativa è vegnida lantschada avant dus ons, radund 80 organisaziuns ed interpresas la sustegnan. Tiers tutgan commembers da la Partida socialdemocratica e dals verds sco era diversas gruppas che s'engaschan per la protecciun d'animals. Dasper il scumond da far experiments cun animals ed umans vul l'iniziativa era scumandar l'import da products per ils quals ins ha fatg experiments cun animals ed umans. I na sa tracta betg da l'emprim'iniziativa en Svizra che prenda en mira ils experiments cun animals. L'on 1992 ha il suveran svizzer sbittà in'iniziativa che vuleva cuntanscher cun plirs pass in scumond d'experiments cun animals. Tenor l'Uffizi federal da segirezza alimentara e fatgs veterinars èn experiments lubids en Svizra mo sch'i na dat naginas alternativs. Il 2017 han ins duvrà passa 600 000 animals per experiments, dus terzs dals animals da test eran mieurs.

Energia, co vinavon?

A Vrin han exponents discutau ina tematica virulenta

■ (anr/abc) Il mund drova adina dapli energia. Automatizaziun e digitalisaziun pretendan quei. Al podi d'energia a Vrin ein treis exponents s'exprimi. Cussegliaer guvernativ Mario Cavigelli ei viagiava a Vrin cun sin auto electric. Ella discussiun ha el tradius sia contribuziun pil clima.

Era ils dus ulteriurs participonts al podi han rispundiü las damondas dil moderatur Martin Cabalzar. Il directur dall'Associazion svizra dils producents d'energia, Michael Frank, ha giu da prender posiziun tiel tscheins d'aua. Ils producents veglien buca sbassar il tscheins als cantuns muntagnards

sil nivel digl onn 1960, mobein sin quel dil 2010, ha el declarau. Gian Derungs, il president dall'Ovra electrica Lumbrein che festivescha uonn siu 100avel anniversari, ei perencunter en ina situaziun confortabla.

> PAGINA 5



Gian Derungs, Michael Frank, Mario Cavigelli e Martin Cabalzar.

FOTO I. SGIER



20012

Servetsch d'abunents e da distribuziun: tel. 0844 226 226 mail: abo@somedia.ch